

四庫全書

史部

欽定四庫全書

史部
元史卷九十八
至一百

御史_臣徐如澍覆勘

總校官編修臣朱鈴

欽定四庫全書

元史卷九十八

明翰林學士亞中大夫和制誥兼修國史宋濂等修

兵志第四十六

兵一

兵者先王所以威天下而折尊姦宄戡定禍亂者也三代之制遠矣漢唐而下其法變更不一大抵用得其道則兵力富而國勢強用失其宜則兵力耗而國勢弱故

兵制之得失國勢之盛衰繫焉元之有國肇基朔漠雖其兵制簡略然自太祖太宗滅夏剪金霆轟風飛奄有中土兵力可謂雄勁者矣及世祖即位平川蜀下荆襄繼命大將帥師渡江盡取南宋之地天下遂定於一豈非盛哉考之國初典兵之官視兵數多寡為爵秩崇卑長萬夫者為萬戶千夫者為千戶百夫者為百戶世祖時頗修官制內立五衛以總宿衛諸軍衛設親軍都指揮使外則萬戶之下置總管千戶之下置總把百戶之

下置彈壓立樞密院以總之過方面有警則置行樞密院事已則廢而移都鎮撫司屬行省萬戶千戶百戶分上中下萬戶佩金虎符符趺為伏虎形首為明珠而有三珠二珠一珠之別千戶金符百戶銀符萬戶千戶死陣者子孫襲爵死病則降一等總把百戶老死萬戶遷他官皆不得襲是法尋廢後無大小皆世其官獨以罪去者則否若夫軍士則初有蒙古軍特默齊軍蒙古軍皆國人特默齊軍則諸部族也其法家有男子十五以

上七十以下無衆寡盡食為兵十人為一牌設牌頭上馬則備戰鬪下馬則屯聚牧養孩幼稍長又籍之曰漸丁軍既平中原發民為卒是為漢軍或以貧富為甲乙戶出一人曰獨戶軍合二三而出一人則為正軍戶餘為貼軍戶或以男丁論嘗以二十丁出一卒至元七年十丁出一卒或以戶論二十戶出一卒而限年二十以上者充士卒之家為富商大賈則又取一人曰餘丁軍至十五年免或取匠為軍曰匠軍或取諸侯將校之子

弟充軍曰質子軍又曰圖爾哈軍是皆多事之際一時
之制天下既平嘗為軍者定入尺籍伍符不可更易詐
增損丁產者覺則更籍其實而以印印之病死戍所者
百日外役次丁死陣者復一年貧不能役則聚而一之
曰合併貧甚者老無子者落其籍戶絕者別以民補之
奴得縱自使者俾為其主貼軍其戶逃而還者復三年
又逃者杖之投他役者還籍其繼得宋兵號新附軍又
有遼東之乂軍契丹軍女直軍高麗軍雲南之寸白軍

福建之畬軍則皆不出戍他方者蓋鄉兵也又有以技
名者曰砲軍弩軍水手軍應募而集者曰達爾罕軍其
名數則有憲宗二年之籍世祖至元八年之籍十一年
之籍而新附軍有二十七年之籍以兵籍係軍機重務
漢人不閱其數雖樞密近臣職專軍旅者惟長官一二
人知之故有國百年而內外兵數之多寡人莫有知之
者今其典籍可考者曰兵制曰宿衛曰鎮戍而馬政屯
田展齊弓手急遞鋪兵鷹房捕獵非兵而兵者亦以類

附焉作兵志

兵制

太宗元年十一月詔兄弟諸王諸子并衆官人等所屬
去處僉軍事理有妄分彼此者達嚕噶齊并官員皆罪
之每一牌子僉軍一名限年二十以上三十以下者充
仍定立千戶百戶牌子頭其隱匿不實及知情不首并
隱藏逃役軍人者皆處死 七年七月僉宣德西京平
陽太原陝西五路人匠充軍命各處管匠頭目除織匠

及和琳建宮殿一切合千人等外應有回回河西漢兒
匠人并扎爾古齊及章吉種田人等通驗丁數每二十
人出軍一名 八年七月詔燕京路保州等處每二十
戶僉軍一名令塔布伊爾統領出軍真定河間邢州大
名太原等路除先僉軍人外於斷事官呼圖克新籍民
戶三十七萬二千九百七十二人數內每二十丁起軍
一名亦令屬塔布伊爾領之 十三年八月諭總管萬
戶劉哈瑪爾據色埒默奏呼圖克等元籍諸路民戶一

百萬四千六百五十六戶除逃戶外有七十二萬三千九百一十戶隨路總僉軍一十萬五千四百七十一名點數過九萬七千五百七十五人餘因近年蝗旱民力艱難往往在逃有旨今後止驗見在民戶僉軍仍命逃戶復業者免三年軍役

世祖中統元年六月詔罷解鹽司軍一百人初解鹽司元籍一千鹽戶內每十戶出軍一人後阿勒達爾倍其役世祖以重困其民罷之七月以張榮實從南征多立

功命為水軍萬戶兼領霸州民戶諸水軍將吏河陰路
達魯噶齊胡王千戶王端臣軍七百有四人八柳樹千
戶威喇軍三百六十一人孟州龐綽爾齊張信軍一百
九十人濱棣州海口總把張山軍一百人滄州海口達
魯噶齊塔喇海軍一百人睢州李總管麾下孟春等五
十五人霸州蕭萬戶軍一百九十五人悉聽命焉 三
年三月詔真定彰德邢州洺磁東平大名平陽太原衛
輝懷孟等路各處有舊屬安扎爾博囉實訥忒庫庫布

哈伯爾克巴圖爾等官所管特默齊軍人乙卯歲籍為
民戶亦有僉充軍者若壬寅甲寅兩次僉定軍已入籍
冊者今隨各萬戶依舊出征其或未嘗為軍及蒙古漢
人民戶內作數者悉僉為軍六月以軍士訴貧乏者衆
命貧富相兼應役其間實有不能自存者優恤之十月
諭山東東路經略司益都路匠軍已前曾經僉犯者可
遵別路之例俾令從軍以鳳翔府屯田軍人準充平陽
軍數仍於鳳翔屯田勿遣從軍刁國器所管重僉軍九

百一十五人即日放罷為民陝西行省言士卒戍金州者諸鄂囉已嘗服役今重勞苦詔罷之併罷山東大名河南諸路新僉防城戍卒四年二月詔統軍司及管軍萬戶千戶等可遵太祖之制令各官以子弟入朝充圖爾哈其制萬戶圖爾哈一名馬一十匹牛二具種田人四名千戶見管軍五百或五百以上者圖爾哈一名馬六匹牛一具種田人二名雖所管軍不及五百其家富強子弟健壯者亦出圖爾哈一名馬匹牛具種田人

同萬戶千戶子弟充圖爾哈者挈其妻子同至從人不
拘定數馬匹牛具除定去數目已上復增餘者聽若有
貧乏不能自備者於本萬戶內不該出圖爾哈之人通
行津濟起發不得因而科及衆軍萬戶千戶或無親子
或親子幼弱未及成人者以弟姪充候親子年及十五
却行交換若妻有親子不得隱匿代替妻有氣力不得
妄稱貧乏及雖到來氣力却有不完善者並罪之是月帝
以太宗舊制設官分職軍民之事各有所司後多故之

際不暇分別命阿哈充都元帥專於北京東京平灤懿
州蓋州路管領見管軍人凡民間之事毋得預焉五月
立樞密院凡蒙古漢軍並聽樞密節制統軍司都元帥
府除遇邊面緊急事務就便調度外其軍情一切大小
公事並須申覆合設鄂囉官並從樞密院設置七月詔
免河南保甲丁壯射生軍三千四百四十一戶雜泛科
差專令把守巡哨八月諭成都路行樞密院近年軍人
逃亡事故者可於各鄂囉內盡實僉補自己卯年定入

軍籍之數悉僉赴軍十一月女直碩達勒達及奇凌貝
地合僉鎮守軍命伊爾布哈僉三千人付塔實雅拉領
之并達嚕噶齊官之子及其餘近上戶內亦令僉軍聽
伊爾布哈節制 至元二年八月陝西五路西蜀四川
行省言新僉軍七千人若發民戶恐致擾亂今鞏昌已
有舊軍三千諸路軍二千餘二千人亦不必發民戶當
以便宜起補從之十一月省院官議收到私走間道盜
販馬匹曾過南界人三千八百四戶悉令充軍以一千

九百七十八人與山東路統軍司一千人與蔡州萬人
餘八百二十六戶有旨留之軍中 三年七月添內外
巡軍外路每百戶選中產者一人充之其賦令餘戶代
輸在都增武衛軍四百 四年正月僉蒙古軍每戶二
丁三丁者一人四丁五丁者二人六丁七丁者三人二
月詔遣官僉平陽太原人戶為軍除軍站僧道伊魯勒
昆達實密儒人等戶外於係官投下民戶運司戶人匠
打捕鷹房金銀鐵冶丹粉錫碌等不以是何戶計驗酌

中戶內丁多堪當人戶僉軍三千人定立百戶牌子頭
前赴陝西五路西蜀四川行中書省所轄東川出征復
於京兆延安兩路僉軍一千人如平陽太原例五月詔
河南路驗酌中戶內丁多堪當軍人戶僉軍四百二十
名歸之樞密院俾從軍復其徭役南京路除邳州南宿
州外依中書省揀定應僉軍人戶驗丁數僉軍二千五
百八十名管領出征十二月僉女直碩連勒達軍三千
人五年閏正月詔益都李璫元僉軍仍依舊數充役

二月詔諸路鄂囉母隸總管府別設總押所官聽樞密院節制六月省臣議僉起圖爾哈官員皆已遷轉或物故黜退者於內復有貧難蒙古人氏除隨路總管府達嚕噶齊總管及掌兵萬戶合今應當其次官員圖爾哈宜放罷其自願留質者聽之十月禁長軍之官不得侵漁士卒違者論罪十一月僉山東河南沿邊州城民戶為軍遇征進則選有力之家同元守邊城漢軍一體出征其無力之家代守邊城及屯田勾當 六年二月僉

懷孟衛輝路丁多人戶充軍益都淄萊所轄登萊州李
瑄舊軍內起僉一萬人差官部領出征其淄萊路所轄
淄萊等處有非李瑄舊管者僉五百二十六人其餘諸
色人戶亦令酌驗丁數僉軍起遣至軍前赴役十月從
山東路統軍司言應係逃軍未獲者今其次親丁代役
身死軍人亦令親丁代補無親丁則以少壯驅丁代之
七年三月定軍官等級萬戶千戶百戶總把以軍士
為差六月成都府括民三萬一千七十五戶僉義士軍

八千六十七人七月分揀隨路砲手軍始太祖太宗征討之際於隨路取發并攻破州縣招取鐵木金火等人匠充砲手管領出征壬子年俱作砲手附籍中統四年揀定除正軍當役外其餘戶與民一體當差後為出軍正戶煩難至元四年取元充砲手民戶津貼其間有能與不能者影占不便至是分揀之八年二月以瓜州沙州鷹房二百人充軍九年正月河南省請益兵勅諸路僉軍三萬詔元帥府統軍司總管萬戶府閱實軍

籍二月命阿珠興行省蒙古軍劉整阿爾哈雅典漢軍
四月詔諸路軍戶驅丁除至元六年前從良入民籍者
當差七年後凡從良文書寫從便為民者亦如之餘雖
從良並令津助本戶軍役七月閱大都京兆等處特點
齊戶名籍九月詔樞密諸路正軍貼戶及同籍親戚僮
奴丁年堪役依諸王權要以避役者並還之軍惟匠藝
精巧者以名聞十二月命府州司縣達魯噶齊及治民
長官不妨本職兼管諸軍鄂囉各路總管府達魯噶齊

總管別給宣命印信府州司縣達嚕噶齊長官止給印
信任滿則別具解由申樞密院 十年正月哈喇請於
渠江之北雲門山及嘉陵西岸虎頭山立二戍以其圖
來上仍乞益兵二萬勅給京兆新僉軍五千人益之陝
西京兆延安鳳翔三路諸色人戶約六萬戶內僉軍六
千五月禁乾討虜人其願充軍者於萬戶千戶內結成
牌甲與大軍一體征進八月禁軍吏之長舉債不得重
取其息以損軍力違者罪之九月襄陽生券軍至都釋

械繫免死聽自立部伍俾征日本仍於蒙古漢人內選
官率領之 十一年正月初立軍官以功陞散官格五
月便宜總帥府言本路軍經今四十年間或死或逃無
丁不能起補見在軍少乞選擇堪與不堪丁力放罷貧
乏無丁者於民站內別選充役從之詔延安府沙井靜
州等處種田已達勒達戶選可充軍者僉起出征六月
穎川屯田總管李珣言近為僉軍事乞依徐州屯田
例每三丁內一丁防城二丁納糧可僉丁壯七百餘人

并元撥保甲丁壯令珣通領鎮守潁州代見屯納罕監
戰軍馬別用從之 十二年三月遣官往遼東僉揀蒙
古達魯噶齊千戶百戶等官子弟出軍詔隨處所置襄
陽生券軍之為農者或自願充軍具數以聞五月正陽
萬戶劉復亨言新下江南三十餘城俱守以兵及江北
淮南潤揚等處未降軍力分散調度不給以致鎮巢軍
滁州兩處復叛乞僉河西等戶為軍併力勦除庶無後
患有旨命肅州達魯噶齊并遣使同往驗各色戶計物

力富强者僉起之六月僉平陽西京延安等路達魯噶
齊弟男為軍萊州酒稅官王貞等上言國家討平殘宋
吊伐為事何嘗以賄利為心彼不紹事業小人貪圖貨
利作乾討虜名目侵掠彼地所得人口悉皆貨賣以充
酒食之費勝則無益朝廷敗則實為辱國其招討司所
收乾討虜人可悉罷之第其高下籍為正軍命各萬戶
管領征進一則得其實用二則正王師吊伐之名實為
便益從之十四年正月詔上都隆興西京北京四路

編民捕獵等戶僉選丁壯軍二千入防守上都中書省
議從各路搭配二十五戶內取軍一名選善騎射者充
官給行資中統鈔一錠仍自備鞍馬衣裝器仗編立牌
甲差官部領前來赴役十二月樞密院臣言收附亡宋
州城新附請糧官軍并通事馬軍人等軍官不肯存恤
多逃散者乞招誘之命左丞陳巖等分揀堪當軍役者
收係充軍依舊例月支錢糧其生券不堪當軍者官給
牛具糧食屯田種養十五年正月定軍官承襲之制

凡軍官之有功者陞其秩元受之職令他有功者居之
不得令子姪復代陣亡者始得承襲病死者降一等總
把百戶老病死不在承襲之例凡將校臨陣中傷還營
病創者亦令與陣亡之人一體承襲禁長軍之官不恤
士卒及士卒亡命避役侵擾初附百姓者俱有罪雲南
行省言雲南屯駐蒙古軍甚少遂取漸長成丁齊呼勒
圖等軍以備出征雲南濶遠多未降之地必須用兵已
僉熨焚人一萬為軍續取新降拉拉和寧等人亦令充

軍然其人與中原不同若赴別地出征必致逃匿宜令就各所居一方未降處用之九月併軍士初至元九年僉軍三萬止擇精銳年壯者不復問其質產且無貼戶之助歲久多貧乏不堪樞密院臣奏宜縱為民遂併為一萬五千諸軍戶投充諸侯王齊哩克昆人匠或託別戶以避其役者復令為軍有良匠則別而出之樞密臣又言至元八年於各路軍之為富商大賈者一百四十戶各增一軍號餘丁軍今東平等路諸鄂囉總管府

言往往人死產乏不能充二軍乞免餘丁充役者制可
十二月樞密院官議諸軍官在軍籍者除百戶總把權
準軍役其元帥招討萬戶總管千戶或首領官俱合再
當正軍一名 十六年正月罷五翼特默齊重役軍三
月括兩淮造回回礮新附軍匠六百人及蒙古回回漢
人新附人能造礮者至京師五月淮西道宣慰司官昂
吉爾請招諭亡宋通事軍俾屬之麾下初亡宋多招納
北地蒙古人為通事軍遇之甚厚每戰皆列於前行願

効死力及宋亡無所歸朝議欲編入版籍未暇也人人
疑懼皆不自安至是昂吉爾請招集列之行伍以備征
戍從之九月詔河西地未僉軍之官及富强戶有物力
者僉軍六百人十月壽州等處招討使李特爾格請召
募有罪亡命人充軍其言使功不如使過始南宋未平
時蒙古諸色人等因得罪皆亡命往依焉今已平定尚
逃匿林藪若釋其罪而用之必能効力無不一當十者
矣十一月罷太原平陽西京延安路新僉軍還籍十

七年七月詔江淮諸路招集達爾罕軍初平江南募死
士願從軍者號達爾罕屬之劉萬努麾下南北既混一
復散之其人皆無所歸率羣聚剽掠至是命諸路招集
之令萬努部領如故聽范左丞李巴圖二人節制 十
八年二月併貧乏軍人三萬戶為一萬五千取貼戶津
貼正軍充役四月置蒙古漢人新附軍總管六月樞密
院議正軍貧乏無丁者令富彊丁多貼戶權充正軍應
役驗正軍物力却令津濟貼戶其正軍仍為軍頭如故

或正軍實係單丁者許傭雇練習之人應役丁多者不得傭雇軍官亦不得以親從人代之 十九年二月諸侯王阿濟格遣使言特默齊軍凡九處出征各鄂囉內復徵雜泛徭役不便詔免之并詔有司毋重役軍戶六月禁長軍之官毋得占役士卒散定海達爾罕軍還各營及歸戍城邑十月僉發漸丁軍士遵舊制家止一丁者不作數凡二丁至五丁六丁之家止存一人餘皆充軍 二十年二月命各處行樞密院造新附軍籍冊六

月從丞相已延議所括宋手號軍八萬三千六百人立
牌甲設官以統之十月定出征軍人亡命之罪為首者
斬餘令減死一等二十一年八月江東道僉事馬奉
訓言劉萬努乾討虜軍私相糾合結為徒黨張弓挾矢
或詐稱使臣莫若散之各翼萬戶千戶百戶牌甲內管
領為便省院官以聞有旨可令問此軍欲從托歡出征
虜掠耶欲且放散還家耶回奏衆軍皆言自圍襄樊渡
江以來與國効力願令還家少息遂從之籍亡宋手記

軍宋時有是軍死則以兄弟若子承代有旨依漢軍例籍之母湮其手 二十二年正月立行樞密院於江南三省其各處行省見管軍馬悉以付焉九月詔福建黃華畬軍有恒產者放為民無恒產與妻子者編為守城軍征交趾蒙古軍五百人漢軍二千人除留蒙古軍百人漢軍四百人為鎮南王托歡宿衛餘悉遣還別以江淮行樞密院蒙古軍戍江西十月從頁特密實言以乾討虜軍七百人籍名數立牌甲命將官之無軍者領之

十一月御史臺臣言昔宋以無室家壯士為鹽軍內附之初有五千入除征占城運糧死亡者今存一千一百二十二人此徒皆性習凶暴民患苦之宜給以衣糧使屯田自贍庶絕其擾從之十二月從樞密院請嚴立軍籍條例選壯士及有力之家充軍舊例丁力强者充軍弱者出錢故有正軍貼戶之籍行之既久而强者弱弱者強籍亦如故其同戶異居者私立年則以相更代故有老稚不免從軍而強壯家居者至是革焉江淞省募

鹽徒為軍得四千七百六十六人選軍官麾下無士卒者相參統之以備各處鎮守 二十四年閏二月樞密院臣言諸軍貼戶有正軍已死者有充工匠者放為民者有元係各投下戶回付者似此歇閒一千三百四十戶乞差人分揀貧富定貼戶正軍制可 二十六年八月樞密院議諸管軍官萬戶千戶百戶等或治軍有法鎮守無虞鎧仗精完差役均平軍無逃竄者許所司薦舉以聞不次擢用諸軍吏之長非有上司之命毋擅離

職諸長軍者及蒙古漢軍毋得妄言邊事

成宗大德二年十二月定各省提調軍馬官員凡用隨從軍士蒙古長官三十名次官二十名漢人一十名萬戶千戶百戶人等俱不得占役行省鎮撫止用聽探外亦不得多餘役占十一年四月詔禮店軍還屬土番宣慰司初西川伊蘇忒爾安珠努特穆爾等所統特默齊軍自壬子年屬籍禮店隸王相府後王相府罷屬之陝西省僧格奏屬土番宣慰司咸以為不便大德十年命

依士子之籍至是復改屬馬

武宗至大元年正月以通惠河千戶劉槃所領運糧軍九百二十人屬萬戶齊勤特穆爾兵籍十二月丞相三寶努等言國制行省佐貳及宣慰使不得提調軍馬若遙授平章揚州宣慰使阿拉克特穆爾者嘗與成宗同乳母故得行之非常憲也今命寶迪代之宜遵國制勿令提調制可

仁宗皇慶元年三月中書省臣奏李瑪格等四百戶為

民初李瑪格等四百戶屬諸王托克托乙未年定籍為民高麗林衍及納延叛皆嘗僉為軍至元八年置軍籍以李瑪格等非七十二萬戶內軍數復改為民至大四年樞密院復奏為軍至是省官以為言命遵乙未年已定之籍後樞密復奏竟以為軍戶十二月省臣言先是樞密院奏準雲南省宜遵各省制其省官居長者二員得佩虎符提調軍馬餘佐貳者不得預已受虎符者悉收之今雲南省言本省藉軍士之力以辦集錢穀遇有

調遣則省官親率衆上馬故舊制雖牧民官亦得佩虎符領軍務視他省為不同臣等議已受虎符者依故事未受者宜頒賜之制可 二年正月詔雲南省鎮遠方掌邊務凡事涉軍旅者自平章至僚佐須同署押其長官二員復與哈必齊 延祐二年二月四川省軍官闕員詔依民官遷調之制差人與本省提調官及監察御史同銓注 三年三月命已延都萬戶府及紅胖襖總帥府各調軍九千五百人往諸侯王所更代守邊士卒

其屬都萬戶府者軍一名馬三匹屬總帥府者軍一名
馬二匹今人自為計其貧不能自備者則命行伍之長
及百戶千戶等助之悉遣精銳練習騎射之士每軍一
百名百戶一員五百名千戶一員復命邁珠囊嘉特二
人分左右部領之

元史卷九十八

元史卷九十八考證

世祖中統三年制十月諭山東路經略司 按原本十

月上復出三年二字上文已載今刪

世祖至元四年依中書省棟定應僉軍人戶驗丁數僉

軍 按棟字舊訛閭今改

世祖至元十七年初平江南募死士願從軍者號達爾

罕屬之劉萬努麾下 按萬努原文萬奴原本於此

處又作萬戶據下文復令萬奴領如故為萬奴之訛

無疑令改

欽定四庫全書

元史卷九十九

明翰林學士亞中大夫知制誥兼修國史宋濂等修

兵志第四十七

兵二

宿衛

宿衛者天子之禁兵也元制宿衛諸軍在內而鎮戍諸軍在外內外相維以制輕重之勢亦一代之良法哉方

太祖時以穆呼哩齊拉袞博勒呼博爾濟為四集賽領
集賽台分番宿衛及世祖時又設五衛以象五方始有
侍衛親軍之屬置都指揮使以領之而其後增置改易
於是禁兵之設殆不止於前矣夫屬橐鞬列宮禁宿衛
之事也而其用非一端用之於大朝會則謂之圍宿軍
用之於大祭祀則謂之儀仗軍車駕巡幸用之則曰扈
從軍守護天子之帑藏則曰看守軍或夜以之警非常
則為巡邏軍或歲漕至京師用之以彈壓則為鎮遏軍

今總之為宿衛而以餘者附見焉

四集賽 太祖功臣博勒呼博爾濟穆呼哩齊拉衮時
號都爾本庫魯克猶言四傑也太祖命其世領集賽之
長集賽者猶言番直宿衛也凡宿衛每三日一更申酉
戌日博爾呼領之為第一集賽即伊克集賽博爾呼早
絕太祖命以博索部代之而非四傑功臣之類故太祖
以自名領之其云伊克者言天子自領之故也亥子丑
日博爾濟領之為第二集賽寅卯辰日穆呼哩領之為

第三集賽已午未日齊拉袞領之為第四集賽齊拉袞
後絕其後集賽常以右丞相領之凡集賽長之子孫或
由天子所親信或由宰相所薦舉或以其次序所當為
即襲其職以掌環衛雖其官卑勿論也及年老既久則
遂擢為一品官而四集賽之長天子或又命大臣以總
之然不常設也其它預集賽之職而居禁近者分冠服
弓矢食飲文史車馬廬帳府庫醫藥卜祝之事悉世守
之雖以才能授任使服官政貴盛之極然一日歸至內

庭則執其事如故至於子孫無改非甚親信不得預也
其集賽執事之名則主弓矢鷹隼者曰和爾齊實保齊
齊哩克齊書寫聖旨曰扎爾拉克齊為天子主文史者
曰筆且齊親烹飪以奉上飲食者曰博囉齊侍上帶刀
及弓矢者曰伊勒都齊庫特齊司閤者曰巴爾噶齊掌
酒者曰達喇齊典車馬者曰烏拉齊摩哩齊掌內府尚
供衣服者曰舒庫爾齊收駱駝者曰特默齊牧羊者曰
和尼齊捕盜者曰和囉噶齊奏樂者曰浩爾齊又名忠

勇之士曰巴圖爾勇敢無敵之士曰巴圖其名類蓋不一然皆天子左右服勞侍從執事之人其分番更直亦如四集賽之制而領於四集賽之長若夫宿衛之士則謂之集賽台亦以三日分番入衛其初名數甚簡後累增為萬四千人揆之古制猶天子之禁軍是故無事則各執其事以備宿衛禁庭有事則惟天子之所指使比之樞密各衛諸軍於是為尤親信者也然四集賽台自太祖以後累朝所御鄂爾多其宿衛未嘗廢是故一朝

有一朝之集賽總而計之其數滋多每歲所賜鈔幣動以億萬計國家大費每敝於此焉

右衛 中統三年以侍衛親軍都指揮使董文炳兼山東東路經畧使共領武衛軍事命益都行省大都督薩奇蘇驗壬子年已定民籍及照李璫總籍軍數每千戶內選練習軍士二人充侍衛軍并海州東海連州三處之軍屬焉至元元年改武衛為侍衛親軍分左右翼置都指揮使八年改立左右中三衛掌宿衛扈從兼屯田

國有大事則調度之

左衛

中衛 並至元八年侍衛親軍改立

前衛 至元十六年以侍衛親軍創置前後二衛掌宿衛扈從兼營屯田國有大事則調度之置都指揮使

後衛 亦至元十六年置

武衛 至元二十五年尚書省奏諾海尼都以漢軍一萬人如上都所立虎賁司營屯田修城隍二十六年樞

密院官安巴奏以六衛六千人塔喇海布格所掌大都屯田三千人及近路迤南萬戶府一千人總一萬人立武衛親軍都指揮使司掌修治城隍及京師內外工役之事

左都威衛 至元十六年世祖以新取到侍衛親軍一萬戶屬之東宮立侍衛親軍都指揮使司三十一年復以屬皇太后改隆福宮左都威衛使司至大三年選其軍之善造作者八百人立千戶所一及百戶翼八以掌

之而分局造作皇慶元年以王平章舊所領軍一千人立屯田至治三年罷匠軍千戶所

右都威衛 國初穆呼哩奉太祖命收扎拉爾烏魯蒙古諾海四投下以安扎爾博囉實訥岱伯爾克巴圖爾庫庫布哈五人領特默齊軍既平金隨處鎮守中統三年世祖以五投下特默齊立蒙古特默齊總管府至元十六年罷其軍各於本投下應役十九年仍令充軍二十一年樞密院奏以五投下特默齊軍俱屬之東宮復

置官屬如舊二十二年改蒙古侍衛親軍指揮使司三
十一年改隆福宮右都威衛使司

唐古衛 至元十八年阿寶克烏蘇言今春奉命總領
河西軍三千人但其所帶虎符金牌者甚衆征伐之重
若無官署何以防閑之樞密院以聞遂立唐古衛親軍
都指揮使司以總之

桂齊衛 至元二十四年立

西域親軍 元貞元年依桂齊唐古二衛例始立西域

親軍都指揮使司

衛候直都指揮使司 至元元年裕宗招集控鶴一百

三十五人三十一年徽政院增控鶴六十五人立衛候

司以領之且掌儀從金銀器物元貞元年皇太后衛以

晉王校尉一百人隸焉大德十一年益以懷孟從行控

鶴二百人陞衛候直都指揮使司至大元年復增控鶴

百人總六百人設百戶所六以為其屬至治三年罷之

四年以控鶴六百三十人歸於皇后位下後復置立

右阿蘇衛 至元九年初立阿蘇巴圖達噶齊後招
阿蘇正軍三千餘名復選阿蘇齊齊克齊拉袞集賽台
軍七百人扈從車駕掌宿衛城禁兼管潮河蘇沽兩川
屯田并供給軍儲二十三年為阿蘇軍南攻鎮巢殘傷
者衆遂以鎮巢六百戶屬之并前軍總為一萬戶隸前
後二衛至大二年始改立右衛阿蘇親軍都指揮使司
左阿蘇衛 亦至大二年改立

隆鎮衛 睿宗在潛邸嘗於居庸關立南北口屯軍徵

巡盜賊各設千戶所至元二十五年以南北口上千戶所總領之至大四年改千戶所為萬戶府分欽察唐古桂齊西域左右阿蘇諸衛軍三千人并南北口大和嶺舊隘漢軍六百九十三人屯駐東西四十三處立十千戶所置隆鎮上萬戶府以統之皇慶元年始改為隆鎮衛親軍都指揮使司延祐二年又以哈喇婁軍千戶所隸焉至治元年置蒙古漢軍籍

左衛率府 至大元年命以中衛兵萬人立衛率府屬

之東宮時仁宗為皇太子曰世祖立五衛象五方也其制猶中書之六部殆不可易遂命江南行省萬戶府選漢軍之精銳者一萬人為東宮衛兵立衛率府延祐元年改為忠翊府未幾復改為御臨親軍都指揮使司又以御臨非古典改為羽林六年英宗立為皇太子復以隸東宮仍為左衛率府

右衛率府延祐五年以詹事圖們岱爾所管薩勒奇諾爾萬戶府及迤東女直兩萬戶府右翼屯田萬戶府兵

合為右衛率府隸皇太子位下

喀喇衛 武宗至大三年定喀喇軍籍凡喀喇氏之非者皆別而黜之驗其實始得入籍及諸侯王阿濟格呼魯蘇所領特默齊屬喀喇氏者令樞密院喀喇衛遣人乘傳往置籍焉

忠翊侍衛 至元二十九年始立屯田府大德十一年增軍數立為大同等處侍衛親軍都指揮使司至大四年四月皇太后修五臺寺遂移屬徽政院并以京兆軍

三千人增入延祐元年改中都威衛使司仍隸徽政院
至治元年始改為忠翊侍衛親軍都指揮使司

宗仁衛 至治二年右丞相拜珠奏圖卜特穆爾叛時
沒入伊奇喇斯人一百戶與今所收蒙古子女通三千
戶清州徹匠二千戶合為行軍五千戶請立宗仁衛以
統之於是命右丞相拜珠總衛事給降虎符牌面如右
衛率府又置行軍千戶所隸焉

右欽察衛 至元二十三年依河西等衛例立欽察衛

至治二年分為左右兩衛天歷二年以本衛屬大都督府

左欽察衛 亦至治二年立始至元中立衛時設行軍千戶十有九所屯田三所大德中置濟爾噶朗特古納兩千戶所至大元年復設四千戶所至是始分為左右二衛亦屬大都督府

龍翊侍衛 天歷元年十二月立龍翊衛親軍都指揮使司以左欽察衛騰吉斯等九千戶隸焉

虎賁清軍都指揮使司

左翊蒙古侍衛親軍都指揮使司

右翊蒙古侍衛親軍都指揮使司

宣忠俄羅斯扈衛親軍都指揮使司

威武阿蘇衛親軍都指揮使司

東路蒙古侍衛親軍都指揮使司

女直侍衛親軍萬戶府

高麗女直漢軍萬戶府管女直侍衛親軍萬戶府

鎮守海口侍衛親軍屯儲都指揮使司

宣鎮侍衛

世祖中統元年四月諭隨路管軍萬戶有舊從萬戶僧格征西軍人悉遣至京師充防城軍孟古岱軍三百一十九人嚴萬戶軍一千三百四十五人濟南路軍一百四十人塔齊爾軍一百四十九人奇扎爾軍一百四十五人馬總管軍一百四十四人三年十月諭益都大小管軍官及軍人等先李壇懷逆蒙蔽朝廷恩命驅駕

爾等以為已惠爾等雖有效過功勞殊無聞報一旦泯
絕此非爾等不忠之愆實李壇懷逆之罪也今侍衛親
軍都指揮使董文炳來奏其詳言爾等各有願為朝廷
出力之語此復見爾等存忠之久也今命董文炳仍為
山東東路經畧使收集爾等直隸朝廷充武衛軍近侍
勾當比及應職且當守把南邊隄防外隙庶內境軍民
各得安業爾等宜益盡心以圖勲效 至元二年十二
月增侍衛親軍一萬人內選女直軍三千高麗軍三千

阿哈三千益都路一千每千人置千戶一員百人置百戶一員以領之仍選丁力壯銳者以應役焉 三年五月帝謂樞密臣曰侍衛親軍非朕命不得發充夫役修瓊華島士卒即日放還 四年七月諭東京等路宣撫司命於所管戶內以十等為率於從上第三等戶僉選侍衛親軍一千八百名若第三等戶不敷於第二等戶內僉補仍定立千戶百戶牌子頭并其家屬同來赴中都應役 十四年五月以蒙古軍與漢軍相叅備都城

內外及萬壽山宿衛仍以伊蘇布哈專領圍宿事 十
五年五月總管胡翔請召還侍衛軍先是宿州蘄縣等
萬戶府士卒百人有旨俾充侍衛軍後從僉省嚴忠範
征西川既而嘉定重慶夔府皆下忠範回軍留西道翔
上言從之九月以總管張子房所匿軍二千二百二十
二人充侍衛軍士 十六年四月選揚州省新附軍二
萬人充侍衛親軍併其妻子遷赴京師 二十四年十
月總帥汪惟和選麾下銳卒一千人請擇昆弟中一人

金史卷一百一十五
統之以備侍衛從之

成宗大德二年八月詔蒙古侍衛所管特默齊軍人子弟投充諸王位下身役者悉遵世祖成憲發還元役充軍大德六年二月調蒙古侍衛等軍一萬人往官山住夏

仁宗延祐六年九月知樞密院事達實特穆爾言諸漢人不得點圍宿軍士圖籍係軍數者雖御史亦不得預知此國制也比者領圍宿官言中書命司計李處恭巡

視守倉庫軍卒有曠役者則罪之以懲其後使無怠而
已而李司計擅取軍數筭士卒在法為過臣等議宜自
中書與樞密遣人案之驗實以聞制可 七年六月以
紅城中都威衛係掌軍務之司屬徽政院不便命遵舊
制伴樞密總之

衛宿軍

世祖至元二十六年七月命大都侍衛軍內復起一萬
人赴上都以備衛宿

成宗元貞二年十月樞密院臣言昔大朝會時皇城外
皆無牆垣故用軍環繞以備圍宿今牆垣已成南北西
三畔皆可置軍獨御酒庫西地窄不能容臣等與丞相
鄂勒哲議各城門以蒙古漢軍列衛及於周橋南置戍
樓以警昏旦從之

武宗至大四年正月省臣等傳皇太子命以大朝會調
蒙古漢軍三萬人備圍宿仍遣使發山東河北河南淮
北諸路軍至京師復命都府左右翼右都威衛整器械

車騎六月以諸侯王駙馬等來朝命發各衛色目漢軍八百二十六人至上京復命指揮使伊克布哈領之

仁宗皇慶元年六月命衛率府軍士備園宿守隆福宮內外禁門十一月樞密院臣言皇太后有旨禁掖門可嚴守衛臣等議增置百戶一員及於欽察桂齊西域唐古阿蘇等衛調軍士九十人增守諸掖門復命千戶一員帥領百戶一員備巡邏從之 延祐三年十月以諸侯王來朝命園宿軍士六千人增至一萬人復命伊爾

根圖嚕分左右部領其事十一月詔圍宿軍士除舊有者更增色目軍萬人以備禁衛十二月樞密院臣言圍宿軍士不及數其已發各衛者地遠至不能如期可遷刈葦草及青塔寺工役軍先備守衛其各衛還家軍士亦發二萬五千人令備車馬器械俱會京師制可六年閏八月命知樞密院事忠嘉領圍宿發五衛軍代羽林軍士仍以千戶二員百戶十員擇士卒精銳者二百人屬之

英宗至治元年正月帝詣石佛寺以其墻垣踈壞命副
樞準台僉院阿薩爾領圍宿士卒以備巡邏八月東內
皇城建宿衛屋二十五楹命五衛內摘軍二百五十人
居之以備禁衛

文宗天曆二年二月樞密院臣言去歲嘗奉旨依先制
調軍把守圍宿此時各翼軍人皆隨處出征亦有潰散
者故不及依次調遣止於右翼侍衛及右都威衛內發
軍一千一百二十六名以備圍宿今歲車駕行幸臣等

議於河南山東兩都府內起遣未差軍士一千三名以備扈從制可五月樞密臣又言比奉令旨放散軍人臣等議常制以三月一日放散六月一日赴限今放散既遲可令於八月一日赴限從之

儀仗軍

世祖至元十二年十二月上尊號受冊告祭天地宗廟調左右中三衛軍五千人為蹕街清路軍

武宗至大二年十二月上尊號百官行朝賀禮樞密院

調軍一千人備儀仗 三年十月上皇太后尊號行冊
寶禮用內外儀仗軍及防護軍色甲馬軍二百人

四年二月合祭天地太廟社稷用蹕街清道及守內外
壠門軍一百八十人命以圍宿軍為之事畢還役七月
以奉迎武宗玉冊祔廟用清路蹕街軍一百五十人管
軍千戶百戶各一員九月以祭享太廟用蹕街清路軍
一百五十人千戶百戶各一員

仁宗皇慶元年三月天壽節行禮用內外儀仗軍一千

人

英宗至治元年十一月命有司選控鶴衛士及色目漢軍以備鹵簿儀仗十二月定鹵簿隊仗用軍士二千三百三十人萬戶千戶百戶四十五員仍議用軍士一千九百五十人萬戶千戶百戶五十九員以備儀仗

致和元年六月以享太廟用蹕街清路軍一百名看覘盆軍一百名管軍官千戶百戶各一員九月行大禮用擎執儀仗蒙古漢軍一千名

文宗天歷元年十一月親祭太廟内外用儀仗并五色
甲馬軍一千六百五十名仍命指揮青山及洪副使攝
折衝都尉提調二年正旦行禮用儀仗軍一千人享
太廟用蹕街清路軍一百名看守粃盆軍一百名管軍
千戶百戶各一員天壽節行禮用儀仗軍一千名皇后
冊寶擎執儀仗用軍一千二百名軍官四員

扈從軍

世祖至元十七年三月發蒙古岱綽爾齊所領西河軍

士及額爾赫麾下二百人入備扈從

武宗至大二年太后將幸五臺徽政院官請調軍扈從
省臣議昔大太后嘗幸五臺於住夏特默齊及漢軍內
各起扈從軍三百人今遵故事從之十一月樞密院臣
言去歲六衛漢軍內以諸處興建工役故用六千軍士
於上都臣等議來歲車駕行幸復令騎卒六千人備車
馬器仗與步卒二千人扈從制可

看守軍

世祖至元二十五年十一月以軍守都城外倉初大都城內倉敖有軍守之城外豐閏豐實廣貯通濟四倉無守者至是收糧頗多丞相僧格以為言乃依都城內倉例每倉發軍五人守之十二月中書省臣言樞密院公廨後有倉貯糧乞調軍五人看守從之

成宗大德四年二月調軍五百人於新浚河內看開武宗至大四年六月帝御大安閣樞密院臣奏嘗奉旨令各門置軍守備臣等議特默齊軍士去其所戍地遠

卒莫能至擬發阿蘇唐古等軍叅漢軍用之各門置五十人制可

仁宗延祐元年閏三月隆禧院官言初世祖影殿有軍士守之今武宗御容於大崇恩福元寺安置宜依例調軍守衛從之三年二月嶺北省乞軍守衛倉庫命於綽哈所屬萬戶三千特默齊軍內摘軍三百人與之

英宗至治元年增守太廟牆垣軍初以衛士軍人共守圍宿故止言蒙古軍四百人至是以衛士守內牆垣其

外壩止用軍士乃增至八百復命僉院哈克繖院判阿拉克特穆爾領之四月敕吹斯戢幹納爾巴克實寺內常令軍士五人守衛

巡邏軍

仁宗皇慶元年三月丞相特們德爾奏每歲既幸上京於各宿衛中留衛士三百七十人以備巡邏今歲多盜賊宜增百人以嚴守禦制可仍命樞密與中書分領之延祐七年五月詔留守司及虎賁司官親率衆於夜巡

金史卷九十九
遼

鎮遏軍

仁宗延祐元年閏三月樞密院官奏中書省言江淝春
運糧八十三萬六千二百六十石取日開洋前來直沽
請預差軍人鎮遏照依年例調軍一千名命右衛副都
指揮使巴延往鎮遏之 三年四月海運至直沽樞密
院官奏今歲軍數不敷乞調軍士五百人巡鎮從之
七年四月調海運鎮遏軍一千人如舊制

鎮戍

元初以武功定天下四方鎮戍之兵亦重矣然自其始而觀之則太祖太宗相繼以有西域中原而攻取之際屯兵蓋無定數其制殆不可考也世祖之時海宇混一然後命宗王將兵鎮邊徼襟喉之地而河洛山東據天下腹心則以蒙古特默齊軍列大府以屯之淮江以南地盡南海則名藩列郡又各以漢軍及新附等軍戍焉皆世祖宏規遠畧與二三大臣之所共議達兵機之要

審地理之宜而足以貽謀於後世者也故其後江南三
行省嘗以遷調戍兵為言當時莫敢有變其法者誠以
祖宗成憲不易於變更也然卒之承平既久將驕卒惰
軍政不修而天下之勢遂至於不可為夫豈其制之不
善哉蓋法久必敝古今之勢然也今故著其調兵屯兵
之制而列之為鎮戍焉

世祖中統元年五月詔漢軍萬戶各於本管新舊軍內
摘發軍人備衣甲器仗差官領赴燕京近地屯駐萬戶

史天澤一萬四百三十五人張瑄格二百四十人解成一
千七百六十人奇扎爾四百六十六人實喇巴圖八
百九十六人扶溝瑪均努一百二十九人內黃特穆爾
一百四十四人趙諾海四十一人鄆陵實都爾古六十
五人十一月命右三部尚書克噶木平章政事趙璧領
蒙古漢軍於燕京近地屯駐平章塔齊爾領武衛軍一
萬人屯駐北山漢軍質子軍及僉到民間諸投下軍於
西京宣德屯駐復命克噶木為大都督管領諸軍勾當

分達勒達軍為兩路一赴宣德德興一赴興州其諸萬戶漢軍令赴潮河屯守復以興州達勒達軍合入德興宣德命漢軍萬戶悲赴懷來縉山川中屯駐三年十月詔田德實所管固安質子軍九百十六戶及平灤州劉布嚕哈所管質子軍四百戶還元管地面屯駐至元七年以金州軍八百隸東川統軍司還成都呼喇濟軍戍東川十一年正月以孟古岱等新舊軍一萬一千人戍建都調襄陽府生券軍六百人熟券軍四百人

由京兆府鎮戍鴨池命金州招討使欽察部領之十二月調西川王安撫楊總帥軍與和尼齊相合與綽哈鴻和爾同鎮守哈達之城十二年二月詔以東川新得城寨逼近夔府恐南兵來侵發鞏昌路補僉軍三千人戍之三月海州丁安撫等來降選五州丁壯四千人守海州東海十三年十月命色岱呼呼必賚巴圖爾二人為都元帥領蒙古軍二千人河西軍一千人守鄂端城十五年三月分揚州行省兵於隆興府初置行省

分兵諸路調遣江西省軍為最少至是以南廣地濶阻
山谿之險命特穆爾布哈領兵一萬人赴之合元帥達
春軍以備戰守四月詔以巴延阿珠所調河南新僉軍
三千人守廬州六月命荆湖北道宣慰使塔爾海調遣
夔府諸軍七月詔以塔爾海征夔軍之還戍者及揚州
江西舟師悉付水軍萬戶張榮實將之守禦江中八月
命江南諸路戍卒散歸各所屬萬戶屯戍初渡江所得
城池發各萬戶部曲士卒以戍之久而亡命死傷者衆

續至者多不著行伍至是總還各營以備屯戍安西王相府言川蜀既平城邑山砦洞穴凡八十三所其渠州禮義城等處凡三十三所宜以兵鎮守餘悉撤去從之九月詔發東京北京軍四百人往戍應昌府其應昌舊戍士卒悉令散歸十一月定軍民異屬之制及蒙古軍屯戍之地先是以李壇叛分軍民為二而異其屬後因平江南軍官始兼民職遂因之凡以千戶守一郡則率其麾下從之百戶亦然不便至是令軍民各異屬如初

制士卒以萬戶為率擇可屯之地屯之諸蒙古軍士散處南北及還各鄂囉者亦皆收聚令四萬戶所領之衆屯河北阿珠二萬戶屯河南以備調遣餘丁定其版籍編入行伍俾各有所屬遇征伐則遣之十六年二月命萬戶富珠哩敬領其麾下舊有士卒守湖州先是以唐鄧均三州士卒二百八十八人屬敬麾下後遷戍江陵府至是還之四月定上都戍卒用本路元籍軍士國制郡邑鎮戍士卒皆更相易置故每歲以他郡兵戍上

都軍士罷於轉輸至是以上都民充軍者四千人每歲令備鎮戍罷他郡戍兵六月周門魚通及黎雅諸處民戶不奉國法議以兵戍其地發新附軍五百人蒙古軍一百人漢軍四百人往鎮戍之七月以西川蒙古軍七千人新附軍三千人付皇子西安王命實喇特穆爾以戍杭州軍六百九十人赴京師調兩淮招討錫沙蒙古軍及自北方迴特默齊軍代之八月調江南新附軍五千駐太原五千駐大名五千駐衛州又發特默齊軍一

萬人及夔府招討張萬之新附軍俾四川西道宣慰使
伊克德濟將之戍鄂端 十七年正月詔以塔爾巴噶
守建都伯奇台守長河西之地無令遷易三月同知淞
東道宣慰司事張鐸言江南鎮戍軍官不便請以時更
易置之國制既平江南以兵戍列城其長軍之官皆世
守不易故多與富民樹黨因奪民田宅居室蠹有司政
事為害滋甚鐸上言以為皆不遷易之弊請更其制限
以歲月遷調之庶使初附之民得以安業也五月命樞

密院調兵六百人守居庸關南北口七月勅更代廣州鎮戍士卒初以丞相巴延等麾下哈必齊軍二千五百人從元帥張弘範征廣王因留戍焉歲久多死亡者至是命更代之復以揚州行省四萬戶蒙古軍更戍潭州十月發砲卒千人入甘州備戰守十二月八番羅甸宣慰司請增戍卒先是以三千人戍八番後征亦奚不薛分摘其半至是師還宣慰司復請益兵以備戰守從之十八年正月命萬戶張珪率麾下往就潭州還其祖

父所領亳州士卒并統之二月以哈必齊軍三千戍揚州十月高麗王并行省皆言金州合浦固城全羅州等處沿海上下與日本正當衝要宜設立鎮邊萬戶府屯鎮從之十一月詔以征東留後軍分鎮慶元上海澈浦三處上船海口十九年二月命唐古特於沿江州郡視便宜置軍鎮戍及諭鄂州揚州隆興泉州等四省議用兵戍列城徙浙東宣慰司於溫州分軍戍守江南自歸州及江陰至三海口凡二十八所四月調揚州哈必

齊軍三千人鎮泉州又潭州行省以臨川鎮地接占城及未附黎洞請立總管府一同鎮戍從之七月以隆興西京軍士代上都戍卒還西川先是上都屯戍士卒其鄂囉皆在西川而戍西川者多隆興西京軍士每歲轉餉不勝勞費至是更之二十年八月留蒙古軍千人行省請戍揚州餘悉縱還揚州所有蒙古士卒九千人行省請以三分為率留一分鎮戍史塔爾琿曰蒙古士卒悍勇孰敢當留一千人足矣從之十月發乾討虜軍千人增

成福建行省先是福建行省以其地險常有盜負固為亂兵少不足戰守請增蒙古漢軍千人樞密院議以劉萬努所領乾討虜軍益之二十一年四月詔潭州蒙古軍依揚州例留一千人餘悉放還諸鄂囉十月增兵鎮守金齒國以其地民戶剛狠舊嘗以漢軍新附軍三千人戍守今再調特默齊蒙古軍二千人令雅爾哈率赴之二十二年二月詔改江淮江西元帥招討司為上中下三萬戶府蒙古漢人新附諸軍相叅作三十七

翼上萬戶宿州蘄縣真定沂邳益都高郵沿海七翼中
萬戶棗陽十字路邳州鄧州杭州懷州孟州真定八翼
下萬戶常州鎮江潁州廬州亳州安慶江陰水軍益都
新軍湖州淮安壽春揚州泰州弩手保甲處州上都新
軍黃州安豐松江鎮江水軍建康二十二翼每翼設達
魯噶齊萬戶副萬戶各一人以隸所在行院 二十四
年五月調各衛諸色軍士五百人於平灤以備鎮戍十
月詔以廣東邊徼之地山險人稀魚江西福建賊徒聚

集不時越境作亂發江西行省呼圖克特穆爾麾下軍
五千人往鎮守之 二十五年二月調揚州省軍赴鄂
州代鎮戍士卒三月詔黃州蘄州壽昌諸軍還隸江淮
省始三處舊置鎮守軍以近鄂州省嘗分隸領之至是
軍官以為言遂仍其舊遼陽行省言懿州地接賊境請
益兵鎮戍從之四月調江淮行省全翼一下萬戶軍移
鎮江西從皇子托歡士卒及劉二巴圖爾麾下萬人
皆散歸各營十一月增軍戍咸平府以察罕伊爾蘇克

言其地實邊徼請益兵鎮守以備不虞故也 二十六

年二月命萬戶劉得祿以軍五千人鎮守八番 二十

七年六月調各行省軍於江西以備鎮戍俟盜賊平息

而後縱還九月以元帥諾海麾下軍四百人守文州調

江淮省下萬戶府軍於福建鎮戍十一月江淮行省言

先是丞相已延及元帥阿珠安塔哈等守行省時各路

置軍鎮戍視地之輕重而為之多寡厥後孟古岱代之

悉更其法易置將吏士卒殊失其宜今福建盜賊已平

惟浙東一道地極邊惡賊所巢穴請復遷三萬戶以戍
守之哈喇岱一軍戍汾海明台伊奇哩一軍戍溫處扎
呼岱一軍戍紹興婺州其寧國徽州初用土兵後皆與
賊通今盡遷之江北更調高郵泰州兩萬戶漢軍戍之
揚州建康鎮江三城跨據大江人民繁會置七萬戶府
杭州行省諸司府庫所在置四萬戶府水戰之法舊止
十所今擇平海汾江要害二十二所分兵閱習伺察諸
盜錢塘控扼海口舊置戰艦二十艘今增置戰艦百艘

海船二十艘樞院以聞悉從之 二十八年二月調
江淮省特默齊軍及漢軍二千人於托歡太子側近揚
州屯駐 二十九年以咸平府東京所屯新附軍五百
人增戍女直地 三十年正月詔西征特默齊軍八千
人分留一千或二千餘令放還皇子鄂囉齊大王珠卜
言切恐軍散釁生宜留四千還四千從之五月命思播
黃平鎮遠拘刷亡宋避役手號軍人以增鎮守七月調
四州行院新附軍一千人戍松山

成宗元貞元年七月樞密院官奏劉二巴圖爾言初鄂州省安置軍馬之時南面止是潭州等處後得廣西海外四州八番洞蠻等地疆界闊遠闕少戍軍復增四萬人今將元屬本省四翼萬戶軍分出軍力減少臣等謂劉二巴圖爾之言有理雖然江南平定之時沿江安置軍馬巴延阿珠安塔哈阿爾哈雅阿嚠罕等俱係元經攻取之人又與近臣阿爾婁博囉等樞密院官同議安置者乞命通軍事知地理之人同議增減安置庶後無

弊從之 二年五月江淞行省言近以鎮守建康太平
保定萬戶府金翼軍馬七千二百一十二名調屬湖廣
省乞分兩淮戍兵於本省沿海鎮遏樞密院官議沿江
軍馬係巴延阿珠安置勿令改動止於本省元管千戶
百戶軍內發兵鎮守之制可九月詔以兩廣海外四州
城池戍兵歲一更代往來勞苦給俸錢選良醫往治其
疾病者命三二年一更代之 三年二月調揚州翼鄧
新萬戶府金翼軍馬分屯蘄黃 大德元年三月陝西

平章政事圖魯卜領總帥府軍三千人收捕西番回詔
留總帥軍百人及階州舊軍圖沙瑪軍各二百人守階
州餘軍還元翼湖廣省請以保定翼萬人移鎮郴州樞
密院官議此翼乃張柔所領征伐舊軍宜遷入鄂州省
屯駐別調兵守之七月招收亡宋左右兩江土軍千人
從思明上思等處都元帥實喇布哈言也十一月河南
行省言前揚州立江淮行省江陵立荆湖行省各統軍
馬上下鎮遏後江淮省移於杭州荆湖省遷於鄂州黃

河之南大江迤北汴梁古郡設立河南江北行省通管
江淮荆湖兩省元有地面近年併入軍馬通行管領所
屬之地大江最為緊要兩淮地險人頑宋亡之後始來
歸順當時汳江一帶斟酌緩急安置定三十一翼軍馬
鎮遏後遷調十二翼前去江南餘有一十九翼於內調
發止存原額十分中一二況兩淮荆襄自古險要之地
歸附至今雖即寧靜宜慮未然乞照汳江元置軍馬遷
調江南翼分并各省所占本省軍人發還元翼仍前鎮

過省院官議以為沿江安置三十一翼軍馬之說本院無此簿書問之河南省官博囉罕其省亦無樞密院文卷內但稱至元十九年巴延伊蘇特穆爾等共擬其地安置三萬二千軍後增二千總三萬四千今悲令各省差占及逃亡事故者還充役足矣又博囉罕言去年巴延點視河南省見有軍五萬二百之上又若還其占後事故軍人則共有七八萬人此數之外托歡太子位下有一千特默齊一千漢軍阿勒巴齊等哈喇婁亦在其

地設有非常皆可調用據各省占役總計軍官軍人一萬三千八百八十一名軍官二百九名軍人一萬三千六百七十二名內漢軍五千五百八十名新附軍八千二十八名蒙古軍六十四名江淞省占役軍官軍人四千九百五十七名湖廣省占役軍官軍人七千六百三名福建省占役軍官軍人一千二百七十二名江西省出征收捕未回新附軍四十九名悉令還役江淞省亦言河南行省見占本省軍人八千八百三十三名亦宜遣還鎮遏有旨兩省各差官赴闕辦議二年正月樞密院言

拉克岱托果斯所領漢人女直高麗等軍二千一百三十六名
內有青海對陣者有久成四五年者物力消乏乞於六衛軍內
分一千二百人大同屯田軍八百人徹爾台軍二百人總二
千二百人往代之制可三月詔各省合併鎮守軍福建所置
者合為五十三所江淞所置者合為二百二十七所江西元
立屯軍鎮守二百二十六所減去一百六十二所存六十四
所三年三月沅州賊人嘯聚命以毗陽萬戶府鎮守辰州
鎮巢萬戶府鎮守沅州靖州上均萬戶府鎮守常州澧州

五年三月詔河南省占役江淞省軍一萬一千四百七十二名除洪澤芍陂屯田外餘令發還元翼七年四月調礪門四川軍一千人鎮守羅羅斯八年二月以江南海口軍少調蘄縣王萬戶翼漢軍一百人寧萬戶翼漢軍一百人新附軍二百人守慶元自納延來者蒙古軍三百人守定海

武宗至大二年七月樞密院臣言去年日本商船焚掠慶元官軍不能敵江淞省言請以慶元台州沿海萬戶府新附軍往陸路鎮守以蘄縣宿州兩萬戶府陸路漢

軍移就汧海屯鎮臣等議自世祖時已延阿珠等相地之勢制事之宜然後安置軍馬豈可輕動前行省孟古岱等亦言以水陸軍互換遷調世祖有訓曰孟古岱得非狂醉而發此言以水路之兵習陸路之伎驅步騎之士而從風水之後難成易敗於事何補今欲禦備姦宄莫若從宜於水路汧海萬戶府新附軍三分取一與陸路蘄縣萬戶府漢軍相叅鎮守從之 四年十月以江浙省嘗言兩浙汧海瀕江隘口地接諸番海寇出沒兼

收附江南之後三十餘年承平日久將驕卒惰帥領不
得其人軍馬安置不當乞斟酌衝要去處遷調鎮遏樞
密院官議慶元與日本相接且為倭商焚毀宜如所請
其餘遷調軍馬事關機務別議行之十二月雲南八百
媳婦大小徹里等作耗調四川省蒙古漢軍四千人命
萬戶囊嘉特部領赴雲南鎮守其四川省言本省地方
東南控接荆湖西北襟連秦隴阻山帶江密邇番蠻素
號天險古稱極邊重地乞於存恤歇後六年軍內調二

千人往從之

仁宗皇慶元年十一月詔江西省瘴地內諸路鎮守軍各移近地屯駐 延祐四年四月河南行省言本省地方寬廣關係非輕所屬萬戶府俱於臨江沿淮上下鎮守方面相離省府近者千里之上遠者二千餘里不測調度卒難相應況汴梁國家腹心之地設立行省別無親臨軍馬較之江浙江西湖廣陝西四川等處俱有隨省軍馬惟本省未蒙撥付樞密院以聞命於山東河北

蒙古軍河南淮北蒙古軍兩都萬戶府調軍一千人與之十一月陝西都萬戶府言碭門特默齊軍一百五十名鎮守多年乞放還元翼樞密院臣議彼中亦係要地不宜放還止令於元翼起遣一百五十名三年一更鎮守元調四川各翼漢軍一千名鎮守碭門黎雅亦令一體更代

泰定四年三月陝西行省嘗言奉元建立行省行臺別無軍府唯有蒙古軍都萬戶府遠在鳳翔置司相離三

百五十餘里緩急難用乞移都萬戶府於奉元置司軍民兩便及後陝西都萬戶府言自大德三年命移司酌中安置經今三十餘年鳳翔離天都土番甘肅俱各三千里地面酌中不移為便樞密言陝西舊例未嘗提調軍馬況鳳翔置司三十餘年不宜移動制可十二月河南行省言所轄之地東連淮海南限大江北抵黃河西接關陝洞蠻草賊出沒與民為害本省軍馬俱在瀕海沿江安置遠者二千近者一千餘里乞以砲手弩軍兩

翼移於汴梁并各萬戶府摘軍五千名益之樞密院臣
言世祖命知地理省院官共議於瀕海沿江六十三處
安置軍馬時汴梁未嘗置軍揚州衝要重地置五翼軍
馬并砲手弩軍今親王托歡太子鎮遏揚州提調四省
軍馬此軍不宜更動設若河南省果用軍則布達拉濟
所管四萬戶蒙古軍內三萬戶在黃河之南河南省之
西一萬戶在河南省之南圖卜台所管五萬戶蒙古軍
俱在黃河之北河南省東北阿拉克特穆爾安圖等兩

侍衛蒙古軍在河南省之北共十一衛翼蒙古軍馬俱在河南省周圍屯駐又本省所轄一十九翼軍馬俱在河南省之南沁江置列果用兵即馳奏於諸軍馬內調發從之

元史卷九十九

元史卷九十九考證

宗仁衛沒入伊奇喇斯人一百戶與今所收蒙古子女
通三千戶清州徹匠二千戶合為行軍五千戶 按
三千戶上舊脫通字與行軍五千之數不合又合為
行軍五千戶句脫戶字並據經世大典增

成宗大德二年八月詔蒙古侍衛所管特默齊軍人子
弟 按成宗元貞三年二月改元大德其四年實大
德二年也舊作元貞四年誤今改

圖宿軍各城門以蒙古漢軍列衛 按原本脫漢字據
經世大典增

世祖至元十七年七月勅更代廣州鎮戍士卒 按原
本脫勅更代三字據經世大典增

至元二十二年詔改江淮江西元帥招討司為上中下
萬戶府下萬戶二十二翼 按志所載止二十翼世
祖本紀及續通考諸書亦少二翼據本卷後成宗元
年江浙行省奏建康太平保定萬戶府全翼軍馬云

云疑此處建康翼之下尚有太平保定二翼也

泰定四年以砲手努軍兩翼移於汴梁并各萬戶府摘
軍五十名益之樞密院臣言世祖命知地理省院官
共議云云 按原本於五千名下脫去益之及樞密
院臣言七字據經世大典增

